XXII

- Bondjoué, dié lo ptét prïnce.
- Bondjoué, dié l' aidieuyou (aiguilleur).
- Qu' ât-ce que te faîs ci ? dié lo ptét prïnce.
- İ décoégnâs (trie) les voiyaidgeous, poi paitièts de mil, dié l'aidieuyou. İ échpédie les trains qu' les empoétchant, taintôt vâs lai drète, taintôt vâs lai gâtche.

Èt ïn échprèche (rapide) çhairè (illuminé), eur'nondaint (grondant) cment l' fûe di cie (tonnerre), fsé trembyaie lai caboinne d'aidieuyaidge (aiguillage).

- Ès sont bin preussies, dié lo ptét prince. Qu'ât-ce qu' ès tieurant ?
- L' hanne de lai yocomotive ne l' saît p' lu-meinme, dié l' aidieuyou.

Èt eur'nondé (gronda), en senche ïnvoirche, ïn sgond l'échprèche chairè.

- Ès rveniant dje ? dmaindé lo ptét prïnce...
- C' n' ât p' les meinmes, dié l' aidieuyou. C' ât ïn étchaindge.
- Ès n' étïnt p' aîjes (contents)?
- An n' ât dimais aîje li voù qu' an ât, dié l'aidieuyou.

Èt eur'nondé lo fûe di cie d' ïn trâjieme échprèche çhairè.

- Ès porcheuyant les premies voiyaidgeous ? dmaindé lo ptét prïnce.
- Ès n' porcheuyant ran di tot, dié l'aidieuyou. Ès dreumant li d'dains, ou bïn ès maindgeant des brussâles. Les afaints de poi yos écraîsant yôs nèz contre les cârreaux.
- Les afaints tot de poi yos saint c'qu'ès tieurant, fsé lo ptét prïnce. Ès preudjant di temps po ènne popnatte de goiyes, èt èlle devïnt brâment ïmpoétchainne, èt che an yos lai rôte, ès pûrant...
 - Èls aint d' lai tchaince, dié l' aidieuyou.